



Sora Sigisberta Hendry

30.7.1917 - 28.2.2001

Maria Anna Hendry (Sr. Sigisberta) ei naschida ils 30-7-1917 a Cavorgia sco quart affon da Giachen Antoni Hendry e Castgina nata Caduff. Ella ei carschida si aunc cun 7 fargliuns. Igl onn 1940 eis ella serendida en claustra a Glion, e 1943 ha ella dau giu il sogn profess. Ella ei spartida da nus ella vegliadetgna da 84 onns ed el 58 avel onn da siu profess. Bunamein gl'entir temps da sia veta claustrala ha ella dedicau alla glied malsauna. Dapli che 32 onns ha ella dau tut sias forzas e siu saver sco tgirunza e dretg maun dil miedi egl ambulatorium dil spital a Glion. Ils cass urgents e l'ambulanza eran sia lavur preferida. Sco tgirunza sin la partiziun dils cass urgents vegneva siu temps privat, sias forzas ed era sia sien biaga alla cuorta. Sora Sigisberta era buca sensibla, quei spitgava ella era da ses pazients, quei ei forsa il motiv, che bia glied havevan plitost tema da quella tgirunza. Sia nuncomplicada persuna vegneva era schazegiada fetg dils miedis. Sora Sigisberta haveva ina dira crosa, mo endadens sesanflava in bien cor ed in lom coc. Ella luvrava fetg e bugen e carezava siu mistregn. Ton pli grev eis ei stau per ella da dar si siu mistregn. Pliaras operaziuns ed era la schliata udida ein stai motivs da sererter anavos e prender pli ruasseivel. Cuort avon Nadal ha ei era tuccau ad elia da dar si siu davos pensum, il parter ora la posta allas soras. Ella haveva buca pli la forza. Quei vuleva ella nuota propi capir, ed aschia ha ella manegiau, aunc mai hagi la claustra suervegniu tonta posta da Nadal. Nus essan engrazievels dad astgau haver sora Sigisberta tons onns.

Ina niaza